

Kutak za sportove na vodi

Internacionalni plivački miting Mladi za mlade

Ovogodišnji miting okupio je više od 300 takmičara iz 32 plivačka kluba iz: Hrvatske, Slovenije, Srbije, Kosova, Bugarske, Crne Gore, Velike Britanije i, naravno, Bosne i Hercegovine

Jedno od najmasovnijih takmičenja u našoj zemlji Udruženja Mladi za mlade Sarajevo, zajedno sa PK Sporttime i suorganizatorom Olimpijski bazen Sarajevo, već drugu godinu za redom realizovalo je Internacionalni plivački miting Mladi za mlade, koji je održan od 18. do 20. oktobra na Olimpijskom bazenu u Sarajevu.

Zahvaljujući kvalitetnom programu i dobroj organizaciji, prošlogodišnji miting uvršten je u kalendar FINA i LEN-a, te podržan od svih relevantnih institucija kao što su: Plivački savez BiH, federalno Ministarstvo kulture i sporta, Ministarstvo civilnih poslova BiH, te Olimpijski komitet BiH.

Došao i Borut Petrič

Ovogodišnji miting okupio je više od 300 takmičara iz 32 plivačka kluba iz: Hrvatske, Slovenije, Srbije, Kosova, Bugarske, Crne Gore, Velike Britanije i, naravno, Bosne i Hercegovine.

Tako je ponovo stigao legendarni trener plivanja Borut Petrič, glavni trener Juga iz Dubrovnika, kao i slovenske reprezentacije. Zajedno sa njim došli su reprezentativka Slovenije Tanja Šmid, te 30 takmičara iz PK Jug. Učestvovala su i dvije najbolje plivačice naše zemlje Ivana Ninković i Nina Žarković, te olimpijac iz Srbije Boris Stojnović.

"Ovo je jedinstvena manifestacija koja okuplja mlade ljude, sportskog zdravlja i takmičarskog duha, sa kojom



Miting na Otoci privukao je mnoga poznata plivačka imena

ujedinjujemo sve nacije i razvijamo prijateljstva, na kojoj se razmjenjuju iskustva i simpatije i stvara pozitivna slika države sa kojom nastupamo u drugim državama", izjavila je Emina Selmanović, PR manifestacije.

Projekat je humanitarnog karaktera, kupovinom ulaznica doniraju se sredstva udruženju EDUS - Udruženje za unapređenje obrazovanja i podrške djeci sa i bez poteškoća u razvoju, s ciljem podrške radu i potrebama koje su neophodne za kvalitetniji rad s djecom.

Seminar za trenere

U organizaciji Plivačkog saveza Kantona Sarajevo i Olimpijskog bazena Otoka 2. i 3. novembra održaće se drugi seminar za plivačke trenere. Kontinuiran rast baze plivača takmičara, plivačkih trenera i plivačkih klubova u BiH te organizacija sve brojnijih respektabil-

nih plivačkih mitinga sa međunarodnim karakterom u našoj zemlji pokazuju da je sportsko plivanje na području BiH u ekspanziji.

Međutim, nastupi naših plivača-takmičara na balkanskom, evropskom i svjetskom prvenstvu, gdje smo se mogli uvjeriti da plivači iz klubova sa područja BiH imaju veliki talenat i potencijal, pokazuju da postoji prostor da se pored baze iskustva kontinuirano povećava i baza znanja stručnog pristupa trenerskom procesu.

Seminar je otvoren za sve zainteresovane trenere i plivačke klubove iz BiH. Predavači bi trebali biti: Igor Veličković, Branislav Kostić, Željko Panić, Erduan Kafedžić, Edin Buljugić, Edin Mirvić i Nika Kozamernik.

Kotizacija za pojedinca iznosi 100 KM, za klub (do pet učesnika) - 250 KM, a za šest ili više ljudi iz jednog kluba - 350 KM.

P. K.